

轉

漕

日

記

序

昔人謂文章之妙如萬斛原泉隨地湧出遇物曲折無不如意夫文以抒意也至於無不如意則是眼前有自具之文筆底有自然之文隨時傾瀉意到筆隨在人意中出人意外此非可與俗人言已

夢韶觀察同年博極羣書氣空流輩往者持節珠江曾有使粵日記久爲藝林膾炙已而出守河洛所至有政聲寅僚爲鐫判語錄存余服其才之敏心之細而謂此

未足以盡夢韶也丙申秋余奉命轉漕江安夢韶亦以開封尹權河南轉運事旋擢是職丁酉季冬余陳臬來中州下車十日夢韶歸自內黃水次袖一編示余曰此上屆轉漕日記也子漕吏故知漕盍觀之余卒讀一過如天花雜狀尋形叵遍以事繫日以律和聲憑弔古今藻績山水令人如在漳衛直沽間至於鹽漕兩大政條分縷晰若網在綱後賢手此冊視事陳牘汗牛可爲藥物此又經緯在胸不僅以英辭麗句垂條結繁也抑

余滋愧者大江黃河之濱淮徐鄒魯之域舳艫千里檣
帆蔽空山燼湖澗可歌可詠而余以才非太白不能觸
景吐懷間有所得亦拉雜堆垛弗堪持示賞音安得如
我夢韶者一爲淳峙增色也因愆懇急付梓並識數言
于首夢韶之文無不如己意夢韶之政無不如人意此
固未足以盡夢韶也

道光丁酉嘉平中澣年愚弟成世瑄拜序

題辭

清芬世德一經傳
瓊宴簪花記廿年
名列甲科聯玉筍
燭輝午夜撤金蓮
曾張鐵網珊洲畔
旋縮銅符板渚邊
五馬風清勳績著
包歐王范繼前賢

挽粟飛芻貢上方
職兼調鼎費平章
情形熟似山爲米
法制操同網在綱
豈遜應龍均估權
不殊劉晏效輸將
星槎指點天河去
絳節牙旗達帝鄉

登朝述職契宸衷
銀箭聲傳曉漏中
晝接龍光融

湛露香飄豸繡被薰風冰銜疊晉臣心惕 溫語三承

聖眷隆更喜金章重入握蘭亭又唱汴城東

攜句驚人可問天買絲我欲繡青蓮編年紀月詩如史
挖雅揚風更是仙艷說聲名齊謝朓况兼政績婉韋堅
瓣香竊效南豐祝願結龍門御李緣

斗山望重下懷傾爲溯淵源始識荆燕市昨曾通夙契
梁園今又訂新盟珠編記事千章雅玉屑霏言四座清
天假此緣同聚首快瞻偉績報隆平

服政清廉道本醇使君原是學中人郵程妙得江山助
史筆猶留翰墨新萬竈引輸徵澤普兩河轉漕樂風仁
經綸調燮鹽梅寄指顧金甌卜 紫宸

平湖 錢福昌 辰田

長河一路聳吟肩斗酒高歌不計篇才子聲華東觀好
詩豪重說李青蓮

纂輯依然舊史才棠陰到處手親栽最難雨雪都如順

幾載梁園燮理來

集中有喜雪
喜雨諸作

天中佳節拜 恩新汴水重游喜卽真我到蘭臺纔雨

月欣隨大雅步芳塵

公以五月五日由山東觀察移大梁吉出守河南同於是日召對

官資畧分覺情深試院追陪劇賞心

丁酉八月公提調文闈吉預充監試

他日汝南成治譜敢將風雅託知音

時奏補汝寧

武進 費庚吉 賡廷

文章經濟非兩事古人難兼今豈多瀛州李侯玉堂器
獨抱治術同蕭何君年弱冠卽名世早躡鼉脊登鸞坡
珠江秉節典秋試鐵網收盡珊瑚柯一麾出守洛陽郡

士農抃舞民風和梁園循聲更稱最姓名首列褒甄科
輜車入覲叩丹陛九華春殿鏘瑤珂 帝曰汝鈞績不
懋宜錫殊典流恩波浚升監司駐鄴郡歲督豫餉浮漳
河君也霓旌早臨莅令甲一下捐煩苛繁陽河水勢東
注長檣巨艦高裁裁材官肅隊導前馬黃皮袴褶深雍
華君坐禮帷判赤牘清風扇處無奸訛百名十姓披簿
籍五米九穀躬飾籬持廉恥竊太倉粟博物能辨瓊山
禾雲帆北指風迅利千艘直下龍騰梭胡牀踞坐澹無

事陶柳毛穎頻摩挲或緝史冊寫忠孝自奏節士臨江
歌或攜賓僚恣酬唱觚騰觥撻朱顏酣興酣催換官燭
寫字穩時倚蓬窗哦全收風景入鎔鑄靜斂藻思歸磨
磨珠聯玉綴積成帙其氣彪炳聲猗那昨來訪君獲縱
覽如讀飛檄蘇沉疴駢鸞攬轡久著錄以視此記慙惡
池風流文采一斑見令我起舞神婆娑匡時偉畧徵蘊
蓄傳家治譜勤搜羅昔賢一官勒一集况君大筆燕許
過八州計日擁節鉞矢音溫室賡卷阿

任邱 邊浴禮 袖石

乍見先呼酒感龍門一樽情重論文依舊示我潞河排
日記筆底旋風驅走疑中有神工護守論史規時知眼
力總古今人物周旋久披未竟早低首 午秋曾訪津
門柳遣愁懷孤吟小舫雉墻鷺候本乏九能工賦說也
似浩然出畫欣睹此鴻篇巨手擬取雪泥詩一卷倩魚
緘就正香山袖來問字我其又

甲午假旋由津潞南下
有紀程小稿容抵都寄

呈筆

右調金縷曲

用集中邊
袖石韻

長洲

顧元愷

杏樓

轉漕日記卷一

河間

李錦章 夢韶

道光十六年丙申九月二十七日。河南糧鹽道章質夫

觀察

廷榜

因固始縣距原籍安徽廬江縣在五百里

內奉

旨迴避歸部銓選其遺缺以廣東南韶道蔣

月川觀察

明遠

調補

撫軍桂燕山中丞

良

因蔣觀

察到任需時現當開兌漕糧疏請以余署理開封府

印務以歸德府萬荔門太守

貢珍

署理

先是余於

十五年計典保薦卓異。本年六月奉部覆准調取引見。因有承審要案未卽請咨。至是權攝道篆。擬於明年押運抵通。就近赴部。經理漕務。向用總運一

員。監兌四員。本年總運爲開封府鹽捕同知永雲樵

司馬。

銘

監兌爲開封府理事同知薩司馬。

靈阿

署鹽

捕同知常司馬。

大治

彰德府糧捕通判奇別駕。

臣候

補通判趙別駕。

登峻

永常兩司馬已於二十六日先

赴楚旺漕次。奇別駕自由彰德前往。楚旺地隸內

黃彰德濱臨衛河各州縣將經徵漕糧運赴該處入倉暫貯兌交幫船領運。

二十八日謝委。

二十九日陸司馬趙別駕赴楚旺。

十月初一日午刻在府署接印卽於是日卸開封府事。

河南漕務在開封彰德衛輝懷慶四府所屬四十一州縣及歸德府所屬商邱寧陵睢州陳州府所屬太康扶溝河南府所屬洛陽偃師鞏縣孟津登封許

州及所屬長葛。共五十三州縣。額徵米十一萬零七

百九十三石零。

兵米及津貼
幫丁米在內

麥四萬六千一百七十

八石零。豆七萬四千八百九十九石零。共二十三萬

一千八百七十石零。如有緩徵帶徵。隨時加減。本省

未設軍船。由直隸通州幫。天津幫。山東德州左幫。任

城幫。臨清前幫後幫。平山前幫後幫。江南徐州前幫

後幫。共十幫糧船協運。額船三百六十一隻。外兵米

船三十二隻。共三百九十三隻。除臨前後平前後徐

前後六幫軍船外其通州天津德左任城四幫及運
載兵米俱雇民船通省額徵漕項銀十一萬六千四
百零三兩零

光山縣獨
無漕項

除支解外造冊候撥 河南

鹽務本地不產鹽未設場竈開封彰德衛輝懷慶陳
州五府許州一州並南陽府所屬舞陽縣食長蘆鹽
每年額銷二十六萬九千三百三十引歸德府並衛
輝府所屬考城縣食山東領運長蘆鹽每年額銷九
萬二千二百六十引河南南陽二府陝汝二州並許

州所屬襄城縣食河東鹽商運民銷每年額銷七萬九千一百四十引汝寧府光州食淮鹽現行票運每年額銷七萬七千七百三十八引通省額收鹽規銀一萬三千六百二十兩零除支解外造冊候撥

初三日祭庫神盤庫 漕鹽二項共貯銀十五萬二千四百四十九兩七錢八分七釐 庫大使以開封府經歷兼之 提支軍銀一萬九千兩暫存內署以備帶赴漕次屆期給發本年支軍約需銀二萬四千餘

兩業經前道提銀五千兩交總運水司馬帶往支
軍者各軍船弁丁應支俸工潤耗盤剝席片及折色
行糧月糧等項銀也。

初七日同署開封府萬荔門太守等饒章觀察請開歸
道張心階觀察坦陪。

初九日部撥南河餉銀三萬兩委試用未入流莫本管
解。

初十日在行宮恭祝

皇太后六旬萬壽。

章觀察起程入都。

是日移入道署。署規

模宏敞。週圍約二三里。大堂東爲儲備庫。西爲官廳。二堂左右有鴿樓二。畜鴿數千。日以高粱二斗飼之。堂後爲仙人樓。內宅在其西偏。前後兩層。東偏爲僉押房。又東幕友所居。簽押房南。船房五楹。以會賓客。前後有池亭。山石花木之勝。簽押房北有射圃。西爲長廊。廊下有洞。入數武。以丸泥塞之。深長不知幾許。俗傳通城東招討營。

四十里

其不經之談歟。廊盡處有

土山前道黎雲屏觀察

學錦

築室其上顏曰彝山舊

壤又西爲菜圃

十二日奏署摺回得旨報聞

十四日章觀察復回省由省回籍在途得其太夫人病耗也

十五日辭行定於十七日赴楚旺水次督兌漕糧

十六日中丞暨司道以下俱來送

十七日辰刻啟程與幕友司稿案者湯薇堂學博朝茶

掌書記者胡晴臯茂才

致中

偕行並邀邊聯璧孝廉

表兄

珏

同往爲司出納出北門行二十五里抵柳園

渡口以少牢祭河禮生贊行二跪六叩禮乃登舟得

句云又向河壩一問津簿書叢裡暫抽身憑君滿掬

東流水洗盡胸間萬斛塵登岸行六里新店早尖

祥符

縣地又十八里封邱縣宿封邱古封父國遺蹟有封

父亭春秋吳晉會於黃池卽其地也戰國爲宋地康

王欲奪其舍人韓憑妻息氏築青陵臺以望之氏作

詩自誓。所謂妾是庶人不樂。宋王是也。漢高帝厄於楚。有翟母者飯之。及帝業成。欲酬其恩。而母已亡。遂封其墓。故曰封邱。原隸開封府。雍正三年改屬衛輝府。漢百里嵩。邑人爲徐州刺史。史所稱甘雨隨車者。東門外有祠。禱雨輒應。邑多邊姓。明邊有猷。官山東布政使。加大僕寺卿。近有邊青藜。官直隸蠡縣知縣。與任邱邊氏爲同族。支派較遠。其譜系不可考矣。

邑令張西林明府。

明

景州人。與余同鄉。往答其拜。

十八日辰刻早飯後行三十五里黃德集茶尖

滑縣地又

十八里牛市屯宿

仍滑縣地

薄暮與幕中諸君子村外一

游得句云居停不耐市聲譁村外閒行日已斜深巷

幾聲聞吠犬叢林萬點集歸鴉天因向暖難成雪地

爲濱河半帶沙更喜寺僧能款客禪房小坐試新茶

十九日辰刻行三十五里沙店早尖

仍滑縣地

又三十五里

宿滑縣館於縣署滑縣古滑伯國非春秋秦人襲

鄭所滅之滑也

其滑在今偃師縣

署西偏有滑伯祠大堂後

過廳中門常閉相傳其下爲滑伯墓唐宋曰滑州歐陽修治滑日名其室曰晝舫齋蔡襄書額嘉慶十

八年教匪李文成等聚眾謀不軌與近畿逆匪林清等密相勾結期於九月十五日同時起事前邑令韓

城強公

克捷

偵知之捕文成至施以三木斷其足賊

黨遂先於九月初六日入城劫文成於獄殺公及夫人張氏其冢婦徐氏罵賊死尤烈戚友從難者數十人同城文武咸被害公子逢泰望泰先事回籍獲免

林逆以失外援與文成等先後敗

仁廟以公首破逆謀功在社稷加知府銜 賜諡忠烈入祀昭

忠祠滑縣及韓城各建專祠夫人張氏贈恭人並封

徐氏爲節烈恭人凡被難者俱從祀逢泰襲輕車都

尉世職後官福建糧道望泰 欽賜進士改翰林院

庶吉士與余爲丁丑同年現官四川成都府同知余

爲史官時手輯公傳今歷公舊部欲詳詢就義時事

而吏胥都非舊人無能道者蓋及今二十餘年矣緬

懷前烈，歆獻久之。

二十日辰刻，偕邑令婁明府內謁滑伯祠，並謁忠烈公

祠，敬題長律三十韻。滑伯畱封域，強公有廟堂。桑

麻今樂土，烽火舊沙場。在昔邪氛熾，惟公劫運當。教

名傳八卦，僞號託三皇。林清天皇李文成地皇馮克善人皇幻術愚黔

首訛言造白洋。詐稱白洋劫寇方謀不靖，公已察非常。欲

正鯨鯢戮，何容魑魅藏。保民斯保國，擒賊必擒王。法

試囊頭苦刑，遭別足傷元。克雖鼠伏逆，黨尙鴟張。縱

使先機燭難將後患防黃巾中夜嘯碧血滿門涼
致命完臣節騎箕返帝鄉糜軀悲冢婦碎首繼尊嫜
宰獸羣思鬪池魚盡被殃遺孤存趙氏大節抗睢陽
苞蘖連畿輔萑苻起殿廊外援先隔絕內難早銷亡
遂遣王師下明將國法彰流氛清彗孛逆燄掃櫬
槍此地欣披霧何人戒履霜豐功垂百世義烈炳三
光褒德推恩澤昭忠錫典章一堂歆俎豆奕葉
被冠裳公子叨同譜通家屬末行昔曾編簡冊今又

拜宮牆。青史真無愧。丹心永不僵。千秋留勁草。百里

愛甘棠。掃壁題長句。升階蕪瓣香。遺徽誰比烈。近有

趙城楊。

道光十五年趙城教匪曹順作亂邑令楊延亮闔門盡節

晴臯詩曰滑伯

城頭烏夜啼。寒風獵獵吹靈旗。星芒閃爍月初墮。青
燐飛入強侯祠。侯在。先朝十八載。滑臺身現絃歌

宰。那知種花皆白蓮。邪氛一片迷塵海。侯乃聞之髯
戟張。孫恩擒到繫銀鐺。渠魁雖已剪梟獍。克徒其奈
多豺狼。風雨滿城月重九。賊夜乘城城不守。城存與

存亡與亡狗城更得梁鴻耦捐軀况有徐夫人拚教
骨肉成飛塵田橫有客競從死池魚殃及葭莩親

九重聞變赫斯怒天戈一掃蚩尤霧聽鼓鼙聲思良
臣疊沛 綸音表祠墓我行今過甘棠封弔侯往蹟
憂心忡歌成不禁淚盈把彈向斜陽楓葉紅聯璧詩
曰忠烈遺風久肅將游踪何幸到琴堂軒窗此日新
官廨鋒鏑當年舊戰場渠賊就擒欣縛虎孤城難保
歎亡羊試尋舉室捐生處砌草常留碧血香薇堂亦

有詩。不備錄。行二十五里。濬縣尖。濬縣古黎陽地。衛水淇水合流爲黎。魏武帝以大枋木遏淇水爲堰。又名枋頭。晉桓溫伐燕爲慕容垂所敗。卽此地也。後爲濬州。明改爲縣。與滑縣俱隸直隸大名府。國朝雍正三年。改屬河南衛輝府。城南有浮邱山。南北長而東西狹。其形如舟。城堞半跨山上。東爲大伾山。勢較高。然遙望亦一培塿耳。未入城。與聯壁晴臯先登浮邱。游碧霞元君廟。登樓一眺。衛河經其西。彎環

如帶。聯璧有詩云。積翠壓城頭。登臨豁遠眸。河流環似帶。山勢狹如舟。紅葉露樵逕。白雲藏寺樓。仙人誰挹袖。空自到浮邱。入城館於黎陽書院。飯後與邑令王明府步鰲游大伾山。大伾卽禹貢導河所經之山。外戴土而中多石。不甚高峻。宋時河水猶經其下。靖康元年。梁方平之師潰於黎陽。金人由此渡河。凡五日。騎兵方盡。笑曰。南朝可謂無人。若以一二千人守此。我豈得渡哉。遂破滑州。嗣後河漸南徙。山上舊

祇有禹廟康熙十五年邑令劉德新創道觀隨山勢
修造殿宇下層鑿山爲呂祖洞上層爲呂祖閣其後
爲萬仙樓皆西向其南偏有斗姥閣魁星閣張三丰
睡像石龕北偏爲道院出城二里許卽至山下迤邐
而登夾道古柏森然已饒幽趣先入呂祖洞深廣如
夏屋石像就厓鑿成轉行而南峭厓壁立對面有軒
小坐流覽其旁則斗姥閣再南循級而上魁星閣及
張三丰石龕在焉睡像亦鑿石而成神氣如生折回

至呂祖閣閣凡三層高類浮圖僅至中層足力已倦少憇登萬仙樓中祀老子四壁範仙像萬餘長不盈尺各極變態憑欄眺望千里平原歷歷在目山下多積沙蓋卽黃河故道也口占一絕 振衣直上碧孱顏南望河流去不還指點黃沙尋禹蹟濤聲猶繞大伾山下至道院啜茶一盃欲謁禹廟詢之道流始知在山頂也不能復登爲之悵然 邑爲先賢端木夫子故里明威寧伯王越邑人有將才總制三邊累

著戰功嘗有句云鬣爲胡笳吹作雪心因烽火煉成丹後與獻縣陳鉞同附中官汪直有小中官阿丑善俳優操兩鉞效直狀趨蹌上前曰吾行軍仗此兩鉞耳直敗越亦遭貶國學生盧柟亦邑人博學多聞以詩酒自放得罪邑令爲所陷下獄瀕死謝茂秦向朝貴訟其冤曰生有一盧柟不能救乃於千載下哀湘而弔沉乎尋得釋卒以沉湎而死一以阿附敗名一以疎狂買禍可不鑒哉又四十五里井店宿已漏

下矣。井店屬直隸開州。距城七十里。開州古爲旌
邱。爲瑕邱。春秋晉趙鞅納蒯賁於戚。亦此地也。漢武
帝時。河決瓠子。帝親臨決口。令從臣自將軍以下皆
負薪作瓠子歌。功成築宮其上。曰宣房州。西南有瓠
子口。蓋卽其處。宋爲澶淵。真宗時契丹大舉入寇。寇
準勸帝親征。至澶淵。士卒望見黃蓋。皆呼萬歲。聲聞
數十里。契丹奪氣。請盟而退。

二十一日辰刻行。二十五里。繞道至次范村。

內黃縣地 謁商

中宗陵有宋開寶七年御祭碑穹窿矗立文典奧而
字秀逸後爲享殿墀下豐碑林立則皆有明及我

朝御祭碑也詩以紀之訪古停征轡郵程入內黃

名都傳亳土其西有村曰亳城爲商故都遺塚拜商王聖敬承家

遠巖恭享國長史難尋墜簡事但紀祥桑塵世幾輪

轉園陵蔓草荒狐狸時露跡塚多狐穴松柏不成行歷代

隆追祀行人屢薦香豐碑林立處披讀幾徬徨又

十里東莊阜尖仍內黃地內黃令汪明府瑚與城守營張

都閭

飛鼎

來迓飯後又行三十里渡衛河

漳水於此合流總

運水司馬等及各幫千總迓於河干又五里抵楚旺

楚旺原名楚王鎮秦將章邯圍趙鉅鹿楚以宋義

爲上將軍將兵救之至安陽逗遛不進日置酒高會

項羽諫不聽遂殺義奪兵救趙鉅鹿一戰羽由此名

顯諸侯此地秦漢時蓋安陽境也鎮有楚王廟

內黃縣治在楚旺東南三十里故殷墟也春秋爲衛

地戰國屬魏曰黃漢曰內黃古以河南爲外河北爲

內故稱陳畱曰外黃。此曰內黃也。柯城春秋會于柯牽城

春秋會于牽繁陽城戰國趙廉頗伐魏取繁陽皆在境內。明隸直隸大

名府。國朝雍正三年改屬河南彰德府。邑爲先

賢。遼伯玉故里。唐張公謹。邑人。秦王將殺隱太子。卜

其濟否。公謹投龜曰。不疑何卜。卜而不吉。庸得已乎。

後副李勣經畧突厥。破定襄。敗頡利。封鄒國公。其孫

釋一行善推步。修大衍曆。沈佺期。邑人。官太子詹事。

詩與宋之間。齊名。稱沈宋。王伯當亦邑人。初爲盜。後

隨李密歸唐密叛被誅伯當從死 公館甚寬敞堂
後上房七楹東爲幕友所居西爲花廳又西爲射圃
植柳數株箭廳有聯云黃菊開時堪對酒綠楊深處
聽鳴弦頗切當

二十二日總運監兌及縣令丞簿及各幫千總俱來謁
本年漕糧除去緩徵添入帶徵實徵米麥豆共二
十三萬七千八百二十六石四斗一升八合九勺向
分四廠兌收開封一廠彰德一廠商邱寧陵
睢州附衛輝一

廠。洛陽偃師鞏縣
孟津登封附

懷慶一廠。太康扶溝許
州長葛附

派常司馬

監兌開廠。薩司馬監兌彰廠。奇別駕監兌衛廠。趙別
駕監兌懷廠。通州幫船二十隻。兵米船三隻。領運

千總張集成。天津幫船十七隻。兵米船三隻。領運千

總慶齡。德左幫船二十四隻。兵米船二隻。領運千總

姜時揚。任城幫船四十三隻。兵米船三隻。領運千總

宛超羣。以上俱民船。每兩隻抵一隻。額船一百一十

五隻。寶船二百三十隻。抵壩卽自散歸。故無押空之

弁臨前幫船二十九隻。兵米船三隻。領運千總王恩錫。空運千總楊月桂。臨後幫船五十五隻。兵米船四隻。領運千總羅鳳標。空運千總齊璋。平前幫船四十一隻。兵米船三隻。領運千總郝淮。空運千總明善。平後幫船四十一隻。兵米船三隻。領運千總廖壽彭。空運千總文陞。徐前幫船四十六隻。兵米船四隻。領運千總曹永平。空運千總富昌。徐後幫船四十五隻。兵米船四隻。領運千總王光烈。空運千總雅達那。共額

船三百九十三隻。實船五百零八隻。運弁十六員。內
惟慶齡楊月桂齊璋文陞未到。餘俱抵次。飯後拜
客。並謁楚王廟。得句云。一劍豪同朱亥椎。奪兵救趙
振聲威。如何蘇子持迂論。亞父當於此日歸。楚旺
村落蕭條。現當兌漕之際。商賈稍集。貨物殊不齊備。
所見不逮所聞也。廣東門人潘廷昭陸羣儒由京
回籍。枉道來謁。

二十三日午刻。赴廠驗米。米質乾燥。稍帶糠粃。飭令風

颺潔淨然後入厰。

二十四日飯後習射。

二十五日辰刻天津幫船抵次領運千總慶齡來謁因河水淺滯咨直隸大名道轉飭沿河各州縣雇備剝船。

二十六日飯後習射。

二十七日濃陰釀雪天氣嚴寒張都閫到鎮彈壓。

申刻請永薩常三司馬奇趙兩別駕及汪明府晚飯。

夜間微雪。

二十八日曉晴。飯後赴厰驗米。獨汲縣無倉。米皆露

積覆以席片。雨雪皆可慮也。行文令其修建。以爲明
歲之用。各幫泊船均有地界。徐前後幫以任城幫

占其泊船之處。具稟申訴。委內黃主簿鄭長煦往勘。
二十九日開厰米收完。署彰德府劉芾林刺史同年

蔭棠

來次。

接邊袖石茂才

浴禮

在府署

書以詞

見寄。強酌臨卽酒。病相如天涯游倦。鷄裘都舊不

是饑來驅我急，肯踏軟紅奔走多。
感是風流太守燕，寢凝香容借榻。
儘燒蘭擘錦周旋久，驪歌唱黯回首。

清霜髡盡黃河柳，數歸程寒鴉老樹。
夕陽古堠遙，憶梁園今夜雪。
官閣燈明如晝，應也念鄒枚賦手。
量取三升知己淚，倩西風吹上君懷袖。
重會面幾時又。

調寄金

縷曲

余和日自飲離亭酒，黯銷魂屋梁落月幾回。

感舊匹馬河干衣袴褶也，逐征塵北走差勝似梁園。
株守鄴下山川憑攬勝，掉吟鞭倍愴分襟久。
雲樹杳。

幾搔首。新詞一闕。羸周柳。伴魚緘傳來。驛使寒梅。

亭堠別後相思。今暫慰。浣讀堪消短晝。真抵得河梁。

攜手爲報踈狂。仍故態。倒金尊起舞。揜長袖。尋舊約。

隔年又。門人愛春圃進士七來謁。蒙古人河南駐防丙戌春闈所

得士也畱於公館小住。

十一月初一日黎明詣關帝廟。大王廟行香。彰

德營熊參戎殿元來拜。

初二日衛廠懷廠米收完。劉芾林暨總運監兌等移

尊公請

初三日彰厥米收完。請熊參戎張都閫並答劉芾林諸君席。平後幫空運千總文陞抵次。

初四日各廠收麥。向例先收花麥至收豆後方收白麥。

初五日爲余生日。畱劉芾林等早麵晚間與幕中諸君子小酌。仍用袖石韻作金縷曲白壽。且盡杯中酒。再休論風塵面目。年年依舊五日暫權京兆事也。逐

監司行走假頭銜糧鹽分守幾點輕霜飛鬢角攬青
銅始訝吾衰久年少景怕回首寒姿本自同蒲柳
况移來紅塵大道秋風古堠四十餘年彈指過何事
消磨白晝滿盤棋讓人先手莫謂桑蓬虛遠志喜清
風攜得盈雙袖歌覽揆這番又

初六日赴廠驗麥麥質乾燥惟多稃秕而雜土塊風颺
以去其稃篩簸以去其塊僅歷開衛懷三廠天已曠
暮不及赴彰廠矣 陳金麓同年 宗魯 於吏部郎中

任內乞養回籍枉道來訪。是日同雲密布天氣驟寒。意必厚得雪澤。乃夜分微作飄灑。不成分寸。旋即晴霽。

初七日赴厥驗麥。由彰厥歷衛懷二厥。仍以前法治之。未到開厥。又復抵暮。永雲樵司馬等在內黃汪明府公館。請劉芾林晚飯。邀余作陪。卽席有贈。仍用袖石韻。勸酌紅兒酒。不比那梨園供奉。風光太舊。素口蠻腰都韻絕。盤內明珠雙走。問誰是杭州太守好。

是眼波撩逗處。奈禪心絮已霑泥久。孤負爾儘回首。
青青却惜章臺柳。怎禁他行人攀折。長亭短堠。幸
許西園陪雅集。良夜拚教作晝。聽一曲琵琶妙手。歸
去著書人不寐。恨添香少。個雙紅袖。知後會定還又。
初八日各廠均置篩篩麥。晚間呈樣尙佳。燈下閱公
文感賦。倏忽煙雲過眼忙。拈毫也自費丹青。幾番
驛遞勞奔馬。一半空文等餽羊。官吏承行多玩愒。
朝廷立法本精詳。後人那敵前人智。毋作聰明亂舊

章 子刻出查夜各廠巡警甚嚴馬上得句 村市
靜無譁人煙有萬家遠燈行熠燿急柝亂蝦蟆飛鏃
寒風勁彎弧缺月斜青驄歸得得一路踏霜華

初九日衛廠懷廠麥收完赴彰廠查驗麥色自過篩後
甚潔淨 臬司因直隸捕獲大河二幫習教水手魏
蘭白二等供出夥黨多名行文通緝委候補知縣周
煦徵來次查糧船水手有無習教匪徒當令各幫運
弁造送水手名冊轉飭總運等及內黃縣會同委員

明日前往點查。

初十日開廠彰廠麥收完。劉芾林定於明日回彰德。晚間設餞並邀委員周令一敘。

十一日各廠收豆。

十二日接中丞牌文以籍隸內黃蘆商張履萃欠課悞運查封備抵委內黃縣及周合同往抄沒並有籍隸上元而在汴省游幕蘆商王昌濟亦以悞運同科其寓所資財移司委員查抵是日傳各幫運弁晚

飯。壽田家叔錫疇自河閒赴汴。路過楚旺。款留小

住。

十三日赴厰驗豆。豆質乾燥。稍帶灰土。飭令風颺。惟中
雜黃綠豆。雖不及萬分之一。然星星觸目。究嫌成色
不純。黃綠豆較黑豆價昂。斷非有意攪和。蓋於播種
時。闌入也。竟無法汰之。詢知往年亦多類此。姑准入
厰。

十四日。因本年臘月初九日。爲家叔六十初度。演劇設

席預爲稱慶。

十五日冬至。黎明率總運各官在關帝廟叩賀。

聖節。敬成一律。節逢長至一陽生。綿棗脩儀賀。聖明。

鳳掖遙瞻。金闕迥。鸞班迴憶玉堂清。定知計日祥
雲沛。且喜今宵皓魄盈。春信果然回黍谷。千倉積粟
賦坻京。家叔偕門人愛春圃赴省。

十六日各廠豆收完。連日查究各幫水手均無習教
之人。惟臨後幫水手張麻子與直隸咨緝名單姓名

籍貫年貌相符。屢經委員等研訊不承。本日親行提訊。亦無確供。自係恃無質証。飾詞狡展。詳請解直歸案質審。

十七日。赴廠驗收白麥。麥質乾燥。顆粒亦飽綻。少帶稔。糝先用風車搗之。再用簸箕揚之。接徐後幫運官王光烈稟。因上年盜米革丁陳六吉汪萼南。溷跡在次。飭內黃縣拿解。徐州衛究辦。

十八日。巳刻。當堂發各幫支軍銀。本年應發支軍銀。

二萬五千九百二十兩六錢七分二釐除扣存徐前
後兩幫在壩借支辦公等項銀一千四百七十三兩
二錢六分一釐外應發銀二萬四千四百四十七兩
四錢一分一釐先發銀九千零四十七兩四錢一分
一釐約十分之四下餘一萬五千四百兩發交總運以備
各幫沿途支領原帶庫銀二萬四千兩計不敷銀四
百四十七兩四錢一分一釐先行墊發

十九日早飯後赴各幫驗船由徐後幫逆泝而上至通

州幫止約長二十餘里各船器具齊備。船內鋪藉亦復完整。日來天氣晴暖。河內絕無流澌。可占利涉。

事畢又赴座船一覽。船共四隻。書役各一隻。余與幕友各太平船一隻。倚窗小坐。啜茶而歸。

二十日巳刻赴開。厥率總運監兌。傳集各幫運弁。當堂烙斛。以部頒鐵斛爲母。將各州縣所製新斛較準。加以印烙封貯待用。回館。張撥派漕糧榜某縣應兌某幫也。是日白麥收完。臨後幫空運。千總齊漳。

抵次。

二十一日巳刻赴開廠率總運監兌眼同各幫運弁查
驗糧色。

二十二日辰刻赴開廠率總運監兌祭倉神開斛兌
運漕倉十詠探筒欲試探囊智攜來釣月筒
長虹憑貫白積蠹漫藏紅兵法攻心上文機學理工
金針如可度治粟有同功樣盤米色先呈樣倉
人進滿盤摘來星的爍擊到月團樂棄取平心酌精

蠹稱意難。躊躇冰鑑握。莫謂取材寬。鐵斛鍊此
錚錚體。平量一斛珠。肖形分子母。依樣畫葫蘆。累黍
頒嘉量。傳薪驗合符。化身千億在。胎息憶洪爐。布
袋縫就機中素。黃雲一袋裝。漸教山阜積。不費斗
升量。人跡隨流水。肩頭送夕陽。將軍休負腹。裏飯任
徜徉。簸箕妙取南箕象。臨風用簸揚。憑看珠錯
落。惟任手低昂。惡似祛稂莠。居前愧秕糠。田家同此
景。秋晚布裙忙。埽帚莫笑千金享。棲糧待掃除。

空場平似鏡。短帚曲如梳。稼穡三冬後。雲烟一瞥餘。
呼童還憶否。庭院落花初。蘆席。畱得寒蘆影。鋪
來席萬條。倉箱憑覆藉。風雨戒漂搖。薄翼層層展。明
珠顆顆跳。烟波尋舊夢。絮雪壓輕橈。竹篩。密織
玲瓏竹。頻搖米入篩。燕泥拋窸窣。珠網結參差。端賴
虛心受。何容細目遺。一塵原不染。風格此君宜。風
車。忽聽輕車走。吹噓滿腹中。亂拋千粒雨。飽送一
輪風。不藉馳驅力。惟資鼓盪功。寒宵聞軋軋。隔巷紡

聲同。木杵。雨粟君休訝。迎風撒一杵。黃梁堆片
席。白木把長鑊。作隊隨鴉集。餘糧任鳥銜。漕艘方兌
運。計日挂征帆。

二十三日。委試用府經歷俞敦本。解倉場。輕賫折席銀
八千三百七十九兩五錢八分三釐。飯後拜客。

夜間不寐。隨口打諢。不覓歡娛。不惹愁。絕無一事
攔心頭。如何伏枕難成寐。終夜朦朧澀倦眸。到底
癡人妄念多。便無風處也生波。升天入地非非想。嚇

走南柯一睡魔。聞道禪家善制心。色聲香味不相
侵。倘教一夢華胥穩。學念南無觀世音。佛法由來
不可思。苦無慧劍斬情絲。不如且數更籌卧。拚得明
朝起又遲。

二十四日。張撥派各幫津貼銀米榜。本年應搭運臨
清磚三千九百三十九塊。到通交納。飭六軍幫均勻
分配。候過臨清時裝載。委員周令回省。

二十五日。飯後習射。

二十六日濃陰竟日。雪意閣雲。入夜復晴。如此者屢矣。
悵悵無似。作望雪詩。長至已經旬。祥霏猶未沛。方
冬行春令。杲杲陽烏曬。黃埃一尺深。田苗渴欲壞。蝗
蝻遺在地。來歲恐貽害。陰陽氣不交。甚哉旱旣太。虔
禱遍山川。穆卜及蓍蔡。今日天驟寒。黑雲垂似蓋。不
見雪作花。但聽風喧籟。入夜望長空。明星若編貝。誰
把烟氛掃。還比并刀快。陰晴屢誤人。天公弄狡獪。我
爲治粟臣。河水涉衣帶。漕糧半入艘。征途已告戒。對

此抱隱憂耿耿殊未艾。焚香夜告天。願把封章拜。倘
令瑞雪霑。醴膏滋。沆漚盈尺兆豐年。農夫得攸賴。拚
逾十日期。不促征帆挂。或者天聽卑。一言納草芥。風
雲渙號施。粧成銀世界。門人丁篠泉明府嘉藻來
謁。

二十七日。天復濃陰寒甚。委平後幫空運千總文陞。
押運天津等處兵米。壽田家叔自省回楚旺。

二十八日晴。臨前幫空運千總楊月桂抵次。改委

內黃主簿鄭長煦解輕賫折席銀。食回網魚戲成。

網爲求魚設。魚偏觸網回。如何魚入罟。終向網中來。自是魚貪餌。非關網易罹。有網魚不見。得魚網不知。

二十九日家叔歸里。

三十日議駁裕州知州王彬請將淮鹽減價敵私稟。王牧奉臬司委赴南陽府屬新野唐縣等處緝匪。因該處界連湖北襄陽襄郡所食淮鹽較該處所食潞鹽

價昂私梟販運致潞鹽侵灌淮綱請將淮鹽減價敵私以固藩籬奉中丞批行核議夫減價敵私固是一法然或成本較重商力又復疲乏一經減價則又恐缺運招私古人成法原不可執一論也使湖北鹽引滯銷該省早應議及况兩江制軍兼理鹽政因地制宜亦必量加調劑何待該牧鯁鯁慮之所稟殊屬越俎如以私梟充斥該處在所必經但當隨時緝拏以杜侵越國課攸關孰能輕議減哉詳文駁之

十二月初一日黎明詣關帝廟大王廟行香。

初二日全漕兌竣連日嚴寒河水間有冰凍之處札

內黃縣暨十幫運弁撥派丁夫預備打冰。

初三日辰刻祭大王廟回館獎賞十幫弁丁。

以銀牌花紅羊

酒等物督運開行詩以紀之繫纜河濱一月餘連檣

北上快何如去來有定隨陽雁首尾相銜入貫魚舟
楫誰勝巨川任斗升總是太倉儲尅期挽出中州境
好待飛章報玉除。

初四日委總運率臨前幫干總王恩錫平後幫干總廖壽彭徐前幫干總曹永平乘駕撥船打冰各監兌

辭歸

初五日親率各幫弁丁打冰首幫之前十幫分段敲打本幫之前各幫自行敲打幫船隨打隨進打冰詞運糧河畔船初乘運糧船下冰早凝扣舷且莫歌水調自製新詞唱打冰鐵鍬木杵森如林但聽千夫邪許音薄冰打得琉璃碎堅冰打作搗衣砧

不分淺瀨與深灘。打過一灣又一灣。前幫打冰冰早
泮。後幫不打船行難。無人不似聽冰狐。有船都作
負冰魚。使君督戰入冰陣。照見此心冰不如。連朝
打冰冰已開。大船小船銜尾來。挽入畿南合守凍。那
管前途冰作堆。

初六日打冰。幫船均挽入直隸大名縣界。出河南境。
稟請 中丞入 奏。並報明 漕帥 倉督 河帥
暨直隸 制軍。

初七日打冰

廖運官以雙杉閣錄別圖求題

號菊屏
松江華

亭人能
詩善畫

爲三截句應之

衛水荒寒凍不流與君同

上木蘭舟披圖細認臨風樹恍在雙杉閣內游 驪

歌一曲唱當筵雪瓜留痕已十年

圖作於道
光丁亥

贏得扁

舟載書畫風流果是米家船 年來閣子是誰憑定

憶尊鱸學季鷹打碎琉璃三十里爲君題句細裁冰

初八日打冰

初九日打冰

賞十幫千總縐袖袍料各一端水手制

錢二百千。

初十日冰堅不能敲打遂於大名縣第六店一帶地方
泊船守凍報明各憲

十一日因辦漕務奏銷留總運在船彈壓啓程回省辰
刻行三十五里東莊尖又三十五里井店宿 整頓
輕裝返汴城寒梅香裏度雙旌漕艘送去千帆穩河
水分來一勺清鴻爪又留今日跡馬蹄重問舊時程
行人莫悵歸期促佇看蟾光兩度盈

十二日辰刻行四十五里。濬縣尖。又二十五里。滑縣宿。
衛輝府耿遜軒太守。省修以開檢命案。亦於是日
抵滑。暢談久之。

十三日辰刻行三十五里。沙店尖。又三十五里。牛市屯
宿。本日天陰而寒。大有雪意向。夕復晴。

十四日辰刻行十八里。黃德集尖。又三十五里。封邱縣
宿。

十五日辰刻行十八里。新店尖。又六里。渡河。又二十五

里抵省謁中丞暨藩臬兩司初更回省省視堂
上兩大人慈體康健爲慰時通省尙未得雪於次
日隨班祈禱

二十日午刻封印前在漕次將和邊袖石金縷曲詞
三閱寄河南府葉小庚太守前輩中蘇茲蒙屬和並

以所刊天籟軒詞學新纂兩函見寄詞曰誰勸青蓮
酒訪遺蹤天津橋廢高樓非舊重葺寄巢郡齋名寬十

笏且息輪蹄奔走笑差勝槐安郡守六易星霜方秩

滿戀 皇恩奚啻三年久。堪容膝。長聚首。新詞忽
寄屯田柳。伴梅花鱗函遠。歷雙雙亭堠。貽我三章金
縷曲。快讀藉消寒晝。應推是花間高手。欲向旗亭偷
賭唱。柰輸君先占雙紅袖。同此樂。幾時又。

二十九日歲除 是日立春